

E scè, cari Moreno President e tùcc vi altri.

Am par mii robe da cred da ves chi a cuntavala sù, dopo quasi mezz secul da quand l'è nasciudi la noso Associazion.

La me primi intenzion par inchéi l'ère chèle da portau chèstu me bon di senze duvé leisc, ma a go mess poc a capì c'a riscciavi da dasmentegà trop rob important e allora ho pensou c'a un brisc det scric u pudève iutam.

A devi ringrazià ul Bruno Giandeini, c'a saludi: Ciao Bruno.

Col te libru "I racconti dell'acero" c'a mi t'èri dicc c'a l'è "un'opera magistrale, ricca di significati... e che durerà nei secoli";

te me règalou l'occascion da dac un'égiada, al te "dizionarietto"

(iscì te le ciamou ti) e u podut tirà fò quai parol du nes dialett

-c'a ma insegnòu ul me pà- c'a biassavi più da un po' det temp.

A dumandi scusi a chi c'am scolta se in chèl c'a disci am schiligherà int una quai paròlo c'a l'è mii propi da Sòuri;

Intant am vegn in ment ul Giuli Gianini -c'a l'è stacc Sindic du nes

Comun dal 1944, al 1966- cosa am discèvee quand mi a sèri ul se segretari.

Aiuti poc se par nui l'è facil cuntala sù a la longa det l'alp, di nes mont e di nes ticc; di vacc e di videi; di cauri, di peuri e di basceci.

Quand a devum pèi parlà det l'aministrazion du comun asc nacorscum subit; ul nes dialett l'è pòuru det paròl giust se tu vòu fat capì!.. E allora i cunt du comun èran sgià diventéi ul preventiu, ul consuntiu cun i registraziui.

E am disceve anca c'a Ronzan a doran na quai parole c'a l'è mii lustess come chèle da Vili. Par esempi: lòu a discian mighi, nui a Vili a discium mii.

C'a scrangian pèi "gli esperti di linguistica dialettale" parchè forzi ul nes bel dialett a l'Accademia della Crusca a Firenze fin inchéi l'è mò mii conosciut!

E allora l'è rùou ul moment da girà indrè ul chèl e la tèste par videi e sminà cosa l'è capitou det important in custi cinquantan a Sòuri, 1969/2019;

senze pèi metes dré a bagherà!.. Ul me pà u discève: la réde la giri!

Primi det tut a devi e vorì ragordam dét tucc cui sgent, en tanti, a sit, c'a mi ho conosciutt e inchéi en più chi. Am fermi un minut!

E adess am vegn in ment l'airu, l'airu u ghè più. L'airu che l'ère là a rente a la giusséne du garnéi det la sgisci det San Lorenz: u ghè più!

E se pensi a l'airu; quanti bot i vecc an parlavan a mi c'a seri sgiovan!

L'ère par lòu quacos det trist e important.

A garès ancha un quai particolar da cuntau sù. Ma l'è mii ul cas da tiral in ball inchéi.

Ul Comun da Sòuri cun ul se Municipi u ghè pù. Par fa cuntent ul Norman e ul Roland l'è diventou una frazion da Faìd. E mii dumà. A man fàcc diventà anca “attinenti di Faìdo”. Ma come discèvi a Fabrizio Defanti sgiù a Béid la sire du 30 det marz -e anca lui a la pensava come mi- la noso attinenze l'è chèle c'a gam in du chér, l'è chèle c'am eréditou dai nes sgent, l'è chèle di nes radisc e allora l'è e la sarà sempre dumà chèle da Sòuri.

Ul Patriziato, ul nes Patriziato, u merite un mucc det ringraziament. L'a pensou giust e la fàcc pulitu a ciapà chèle grand bèle decision da fà nì indrè da Faìd la cà comunà e da fala diventà la cà patrizial da Sòuri. L'è stacia un'operazion da valor c'am fa tantu piascé. Anca parchè li a ghère int la noso schére e li mi -con la Maria Defanti e la Dina Giulietta- o cominciou la me primi elementar!

L'ère ul quattu d'ociouri du milaniucenquarantott. (4.10.1948).

Ma a Sòuri è restou ul nes simbol **ul gatt** c'a l'è su su la noso bandére sgià dal 1953. E ghè mò anca cù vù, bianc e neiri e bianc e ross. Cù dal pèr chert e lisc e cui dal pèr long, c'am ragordi ben ai ciamavum i gatt bragant. E péi a Sòuri en restei tucc cui béi rob c'a la fàcc la noso Associazion.

L'Associazion c'a la gà quasi cinquantan; l'è chì sana, bèle e vaiga; cun ul President Moreno e tucc cù c'a lavoran isci ben in seme. GRAZIE!

Ho decis da mii di pisei inchéi. Ho sgià scric e dic quand eran 30.

Ho dic, senze scriu, quand eran 40 i an. Ho scric e dic ul 30 det marz sgiù a Béid: in occascion det chèl bél Galà che ghit organizou.

E i rob ripetut, vi altri al sit, a sonan mii ben all'urège det chi c'a scolta.

Quaicòs pèi, par mi tantu important, l'è da mii dascentegà.

L' ho dic e scric. “Sei e sarai sempre la **gloriosa** Associazion”.

E adess au stufisci pù. Au disci arrivedes al 13 det dicembre det chestu an a Faìd. Dove?.. it ricevut ul programma e sit stacc invidèi.

Lì sarà la siri giusti da bofà sui 50 cander c'a saran stacc impiantéi in da la torta par fà feste a la noso Associazion!

E par inchéi a disci a tucc grazie c'a sit chi e bona giornada.

Ciao.

Prato Leventina-Sobrio, 11 agosto 2019